






N^o. 5259



3

100

#



6-8
11

Lang. Se Du Fermier.

ADVERTISSEMENT

A TOVS LES ESTATS

DE L'EVROPE,

*Touchant les maximes fondamentales,
du gouvernement & des desseins
des Espagnols.*



A PARIS,

M. DC. XXV.

ADVERTISING

A TOVS LES ESTATS

DE REVOLTS

Case de la Cour

F

39

326

1625d



A PARIS

M. DE LXXA.



AV LECTEUR.



E demeure d'accord qu'il seroit à desirer que ces escrits ou il est parlé des Rois & de leurs Estats, n'eussent iamais veu le iour: Chacun deuroit se contenir en respect & en reuerence à l'endroit des puissances establies de Dieu, & il y auroit bien plus d'honneur & de plaisir de s'adonner à descrire leurs actiōs heroïques, leurs journées, & leurs conquestes sur les Turcs & sur les Infidèles, que de descrire ainsi les pratiques & les complots de leurs mauuais seruiteurs, pour essayer d'enuahir dans le

2
cœur de la Chrestienté, le bien de leurs amis, de leurs alliez, de leurs voisins, & puis qu'ils sont tous Princes Chrestiens, de leurs freres. Cela donc ne nous doit pas estre reproché, puis que nous protestons deuant Dieu & ses Saints Anges, que c'est avec regret & avec extreme desplaisir que cecy arriue. Les François s'y sont portez tres-innocemment & tres-modestement. Toute l'Europe est pleine des liures Espagnols qui disent que les Rois d'Espagne sont les vrais descendans de Clouis & de Charlemagne, & que la France leur appartient, non pas à nos Rois; qui accusent nos Rois d'heresie & d'impieté; qui tesmoignent vne si grande haine contre nous, que tout ouuertement ils se mocquent de toutes les choses les plus saintes, qui sont creuës pieusement dans nostre Estat, comme de la sainte Ampoule, de l'O-

4
riflan, de la guerifon mefmes des Escroüelles, encor qu'ils y recourent tous les jours à milliers; qui defchirent nos Rois, comme peu Chreftiens, à caufe des droicts les plus anciens de la Couronne, qu'ils ont tousiours faiet valoir innocemment à l'honneur de Dieu, & au bien de l'Eglife, admettans les appellations comme d'abus de ceux qui recourent à eux, comme les vrais protecteurs de la Religion dans l'Eftat, & les defenfeurs perpetuels des perfonnes facrées; qui ne laiffent, pour le dire fommairement aucune des parties de cefte Monarchie tres-Chreftienne qu'ils ne blafment tres-ouuertement, & qu'ils ne defcrient parmy les autres nations. A tout cela, iufques icy, nous n'auons oppofé que le mefpris, & le filence. Si nous auons trouué ez efcrits de leurs Theologiens, expliquans les myfteres de la pieté, des questions trai-

tées au des-honneur de nos Rois,
nous auons blasmé leur passion, nous
n'y en auons pas opposé vne sembla-
ble, mais nous l'auons mesprisée. En
fin ces liures infames, ces pieces execra-
bles, ces satyres, & ces libelles, que des
rejettons, & des arriere-nepueux de ce
monstrueux Aretin, qui s'appel-
loit *Le fleau des Princes*, ont mis au
jour; Ces *Mysteres Politiques*, venus
de l'escole que l'Ecriture sainte ap-
pelle, *Les Mysteres, & les profondeurs
du Diable*; Ces Remonstrances au Roy
LOUIS XIII. qui sont semblables
à l'impudence de ceux qui par derision
offroient vn chien en sacrifice, & à
l'impieté des Iuifs, qui se mettoient à
genoux deuant nostre Sauueur IESVS
pour luy cracher au visage: Ce beau
Banquet des Princes Calvinistes; Toutes
ces impietez, ces rages, & furies publi-
ques, ont irrité la plus obstinée mode-

stie, & la plus endurcie patience qu'on eust peu trouuer. On n'a pas respondu à la centiesme partie de leurs furies; on a touché simplement ce qu'on croyoit necessaire pour aller au deuant de leur dessein, qui est de desbaucher les peuples, & de les reculer, sous espece de pieté, de ce que la pieté leur recommande le plus, qui est l'amour & l'obeissance de leur Roy. Les fers sont encor' au feu, & ceux qui n'ont faict qu'esbaucher l'ouurage seront bien tost suiuis, & s'il plaist à Dieu, deuancez par ceux qui ont reculé pour aller plus auant. Il est à esperer que d'oresnauant il ne se trouuera pas de gens si abominables parmy nous qu'ils osent reprocher à vn homme, qu'il est *Catholique d'Estat*, où *Bon François*, où *Catholique de Cour*, où *Catholique du Palais*. C'estoient les sobriquets, les dictons, & les mots de gueule de certains

hypocrites, qui l'un de ces jours, si les
Espagnols ont quelque chose à de-
messer avec la Sainteté, comme il
peut arriuer, & plustost qu'on ne pen-
se, treuueront aussi hardiment à repro-
cher d'estre *Catholique Romain*, par ce
que rien n'est tant à leur goust (on ne
sçait pas pourquoy) que d'estre *Catho-
lique Espagnol*. A la verité cela est pro-
digieux, & menace de quelque desol-
lation ceux qui en sont les auteurs,
de voir que le mot d'*Estat* soit
odieux à ceux qui en viuent, qui sero-
ient de pauvres gueux sans l'Estat, &
qui n'auroient ny biens, ny honneurs,
ny dignitez, ny personne au monde
qui les ostant aduouier pour parens ou
pour amis, s'ils n'auoient trouué dans
l'amour de l'Estat quelque soulage-
ment à la bassesse & à l'infamie de leur
fortune. Les liures sont encor impri-
mez, où on peut lire pour reproche

Statia-

Statianorum Secta: La Secte de ceux qui aiment l'Estat. On a ouy courir par les ruës les reproches de *Cardinal d'Estat*. De maniere que dorefnauant on pourroit craindre que ce ne fust vne heresie que *Conseiller d'Estat*, *Secretaire d'Estat*, & *Roy amateur de l'Estat*. Dans l'Eglise il n'y a point de glorieux nom pour estre sauué, que celui de *Catholique Romain*, parce que c'est l'adueu & la profession publique qu'un Chrestien doit faire, d'estre membre de l'Eglise hors laquelle il n'y a point de salut. C'est vne particuliere & expresse renonciation qu'il faict à toutes les sectes qui sont dans la Chrestienté, protestant qu'il n'est point adherant à pas vne communion de toutes celles qui se disent Chrestiennes, si ce n'est à celle-là seulement, qui a le chef visible de l'Eglise, qui est fondée sur la pierre in-
esbranlable, qui, sans interruption des-

puis les Apostres iusques à nous, retient
la Hierarchie Ecclesiastique, qui est le
lien indissoluble des peuples & des
Euesques, sous vn seul chef ministeriel
qui est le Pape, pour estre eternelle-
ment vnie à nostre Seigneur I E S V S-
C H R I S T, qui en est le Chef essentiel,
le seul Sauueur & Redempteur qui est
benit eternellement. Il suffiroit à la
verité de dire *Catholique Romain*, pour
exprimer vn bon subject, vn fidelle
subject, vn vray François en France,
vn bon Espagnol en Espagne, & ainsi
ailleurs. Mais la malignité de quelques
trahistres qui tournent à blasme, ce de-
quoi il faut pour estre sauué qu'vn cha-
cun fasse profession, qui est d'aimer le
Roy, & d'estre affectionné à l'Estat, a
mis en auant ce nom, duquel les gens
de bien n'auront jamais honte. On
dit en France par reproche des Hu-
guenots factieux, qu'ils sont *Hugue-*

9
nots d'Estat. Cela est tres-faux, & i'a-
merois bien mieux appeller ainsi ceux
qui sans faction se tiennent simple-
ment dans la liberté qui leur est per-
mise par les Edits, & qui ne laissent
pas aux occasions de seruir le Roy, &
de luy estre fidelles. Ceux qui font mal
à l'Estat, qui le troublent, & qui font
rebelles au Roy, sont tres-indi-
gnes du tiltre *de Huguenots d'Estat*,
si ce n'est à raison de l'antiphrase,
parce qu'ils en recherchent la ruine.
Ceux qui blasment ce tiltre, crai-
gnans qu'il soit de quelque Machia-
ueliste, se peuuent desabuser quand il
leur plaira. L'auteur du tiltre, comme
ie sçay tres-bien, n'a iamais pretendu
autre chose, que de monstrier simple-
ment qu'il ne se peut pas qu'un hom-
me soit bon Catholique sans aimer le
bien de l'Estat. Je le lis ainsi dans son
écrit page 7. 19. & 20. Et si ceux qui

10
ont leu de bon cœur les liures contre
le Roy, & qui les ont loüez à leurs a-
mis, n'eussent pas fait conscience de
lire la responce du Roy, il y a apparen-
ce qu'ils se fussent payez de raison. Le
titre de *Catholique Romain*, me distin-
gue d'auec vn Huguenot & vn hereti-
que: celui de *Catholique d'Estat* me di-
stingue d'auec vn vieux Ligueur, d'auec
vn factieux, d'auec vn ennemi caché
du Roy & de l'Estat. Ce n'est pas dire
dauantage que de dire, *Catholique Fran-
çois*. Et du temps de la ligue, on a de-
fendu nos Rois sous ce titre contre les
maudites calónies de la ligue, publiées
côté le feu Roy Henry le Grand, sous
le nó du *Catholique Anglois*. Quand on
distingue dans Rome les Cardinaux
capables d'affaires, & qui s'adonnent à
seruir la Chrestienté en la direction &
maniment des plus importâtes occur-
rences, d'auec ceux qui meinent vne vie

7m
11
retirée, on dit vn *Cardinale Statista*, sans
aucun scrupule ny scandale. Si les tiltres
que les malicieux peuuent destourner
en mauuais sens sont à rejeter, il n'en
est pas vn qui demeure. Mais comme
lors que les Payens reprochoient aux
Chrestiens *le scandale de la Croix*, les
Chrestiens se glorifioient tant plus du
signe de nostre redemption, & le pei-
gnoient par tout: Et comme aujour-
d'huy quand les Huguenots en haine
du Pape nous appellent Papistes, plu-
sieurs Theologiens demeurent d'ac-
cord que tāt s'en faut que ce tiltre soit
honteux, qu'au contraire il nous est
honorable: Ainsi quand les hypocrites
qui seruent aux estrangers contre le
Roy, blasment les plus grands Mini-
stres de l'Estat comme *Catholiques d'E-
stat*, il est raisonnable que les gens de
bien tesmoignent que ce tiltre est glo-
rieux, à la honte de ceux qui ne le haïss-

12
sent que de peur qu'ils ont de deuenir
eux-mesmes Catholiques d'Estat, &
bien affectionnez. Chacun a veu venir
du pais Bas, vn Liure intitulé *Christia-
no-politicus*, & les Theologiens Catho-
liques en sont les auteurs. Je voudrois
bien sçauoir s'il y a plus de mal à dire,
Catholique d'Estat, que de dire *Chre-
stien Politique*; & si ce n'est pas vne mes-
me chose, de dire le *Politique Chrestien*,
& de dire, *l'homme d'Estat Catholique*.
Car qu'est-ce autre chose Catholique
d'Estat, que l'homme d'Estat Catho-
lique? Ceux qui ne pointent leur ca-
non que contre les girouettes, mon-
trent bien qu'ils n'ont pas de quoy for-
cer le corps de logis. Et plusieurs cro-
yent que ceux qui parlent du tiltre
haïssent plus la doctrine du liure; la-
quelle toutesfois est si Catholique,
qu'il n'y a que les plus infames impies
qui la puissent reuoquer en doute. Ce

la soit dit cōtre les meschās, & sans of-
fencer ceux qui en peuuent auoir parlé
à bōne intention, & sans blesser l'hon-
neur de personne. Il est à esperer aussi
qu'à l'aduenir on ne fera pas des dis-
cours parmy nous, qu'il n'y a que les
Espagnols qui embrassent les interets
de la Religion, & que toutes leurs ar-
mes n'ont point d'autre but que l'a-
uancement de l'Eglise. Ces Proposi-
tions iustifieront la verité, & enseigne-
ront solidement ce qu'il en faut croire.
C'est le sentiment des Catholiques Ita-
liens, qui nous diront l'un de ces jours,
qu'ils sçauent bien le mal qu'on leur
prepare, sous pretexte de Religion.
C'est celuy de tous les Estats de l'Euro-
pe, qui craint le plus d'estre opprimé.
Les preuues sont prises des recueils de
l'histoire, & le plus souuēt de celle mes-
me que les Espagnols ont publiee, &
qui a passé par l'examen de l'Inquisitiō.

Il n'y a pas d'apparēce de s'en plaindre: parce que l'histoire est du droict des gens, & dēs qu'elle est publiee, elle sert de tiltre à toutes les natiōs pour en vser en leurs affaires: parce que les étrāgers ne peuuent pas estre blasmez d'auoir produit ce que les sujets naturels escriuent avec approbation: parce que la verité des choses alleguées est si publique & si cognuë à toutes les nations de l'Europe, que ceux-là qui s'en voudroient plaindre n'en oseroient eux-mesmes douter sans rougir. Je croy que ces Theses & Propositions-cy, valent bien celles de la Remōstrance execrable faite au Roy. Si les auteurs de telles furies se taisent, & apprenent de meshuy, que les François ne sont pas tout à faiēt stupides, il n'en est pas vn de nous qui ne demeure volontiers dans le silence.

PROPOSI-



PROPOSITIONS

DE LA PLUS PART

DES ESTATS DE

l'Europe.

1. *Les Espagnols ne cessent jamais de conquerir.*

DE PUIS cent ans ils ont acquis, sous faux tiltres, & abusans du nom de la Sainteté & de la Religion, plus de cent Royaumes ou Empires aux Indes, dont ils ont tout à fait exterminé les Rois & leur race, & assubjetty miserablement leurs peuples, après les auoir affoiblis par des

A

carnages & tueries incroyables. Ils ont acquis en Italie, au prejudice de la liberté d'Italie, sur les François, qui en estoient Princes legitimes & naturels, le Duché de Milan, le Royaume de Naples, & auparavant le Royaume de Sicile. En Allemagne ils ont jusqu'à present tenu l'Empire hereditaire, & font ce qu'ils peuvent pour effacer l'eslection, comme ils ont fait es Royaumes de Hongrie, & de Boheme. Ils ont le Palatinat, Iuliers, Cambray, & toute la plus grand' part de la succession de Cleues. Ils tiennent toute l'Allemagne diuisée. Ils ont voulu auoir la France au temps de la Ligue. Ils auoient n'agueres occupé tous les Grisons. Ils ont fait des entreprises sur la ville de Strasbourg, & autres.

2. *Ils commencent toutes leurs conquestes par pratiques & menées couuertes, que leurs Ministres font dās les Estats qu'ils veulent enuahir.*

Ils furent aux Indes sous pretexte de

trafic, & de leur porter l'Euangile. Les plaintes de tous les Estats de l'Europe sont sur ce sujet toutes semblables. Ainsi le disent les Italiens, les Allemãs, les Anglois, & les François ne s'en peuuent taire. La Royne Elizabeth fust recherchée de paix par Philippes I. I. Leurs Ambassadeurs estoient assemblez à Bourbourn. Ce n'estoit que pour l'endormir, à fin d'opprimer l'Angleterre par l'armée, qu'ils appelloient (sans auoir compté avec Dieu) l'inuincible. Henry III. auoit paix avec le mesme Philippes II. son beau-frere, quãd il forma la Ligue en France, qui débaucha quasi tout l'Estat, & faillit à jetter en mesme temps dans le tombeau l'Estat avec le Roy d'un mesme coup. Qui n'en lit l'histoire, ou qui ne l'a veu, aura de la peine à croire les artifices épouuentables dont on se seruoit pour faire haïr le Roy, le plus aimable qui fust jamais.

3. *Ils entreprennent plus hardiment sur les Catholiques, que sur les heretiques.*

Tesmoins en sont l'Italie, le Portugal,

& la France. Iamais les Espagnols n'ont si genereusement osté le bien des heretiques, qu'ils nous ont osté Milan & Naples, & en vn temps que nous faisions brusler tous vifs les heretiques. Charles le quint rendit au Duc de Saxe heretique ses Estats, & ne nous voulut iamais rendre le Duché de Milan.

4. *Ils laissent en repos les Mahometans, pour entreprendre sur les Estats de la Chrestienté.*

Si ce que les Espagnols ont despendu contre la France, contre l'Italie, contre l'Allemagne, & contre l'Angleterre, eust esté employé contre les Turcs, il y en eust eu assez de la moitié pour les chasser de l'Europe. Charles le quint rendit Tunis à Muleassem Turc, & ny luy ny les siens ne nous ont iamais voulu rendre la Nauarre.

5. *Ils se seruent tousiours du pretexte de la Religion, sui-*

5

*uant le precepte de Machia-
uel.*

Ainsi aux Indes , en Allemagne , en France, aux Grisons. Tous les conquerans ont eu ceste ruse. Ainsi Philippes de Macedoine, sous pretexte de venger les sacrileges , afferuit les Grecs. Alexandre le grand vouloit estre creu engendré de Dieu, pour pouuoir plus facilement tyranniser les hommes. Les Romains, pour adoucir la seruitude des nations , portoient leurs Dieux à Rome. Mahomet, le Turc, le Cherife, ont eu le mesme pretexte. On le recognoist aussi bien à Rome qu'à Paris, & les Italiens, comme les François, disent que le masque est leué, & qu'il y a déjà lōg temps qu'on voit à trauers de ce faux visage.

6. *Ils entreprennent sur le Pape , tant au spirituel , qu'au temporel , aussi hardiment que contre les autres Princes de l'Europe.*

Gerard
de Roo.

Ils publient les indulgences en Sicile, ils disposent des excommunications, & par derision ils y ont voulu celebrer le Jubilé. Ils ont prins beaucoup de fois des terres de l'Estat du Pape. Ils ont pris Rome, & l'ont pillée, tué les Cardinaux, & rançonné le Pape. Vn Secretaire de la maison d'Austriche, en la Genealogie de leur maison, imprimée avec Eloge, & privilege de l'Empereur Rodolphe II. dit que Rodolphe d'Absbourg premier Empereur, fut excommunié pour auoir fait la guerre aux Ecclesiastiques; & que l'Euesque de Basse, sçachant qu'il auoit esté esleu pour Empereur, leuant les mains au Ciel s'escria; *O Christe firmiter te in sedili tuo cõtine, ne te Comes deturbet.* Ce bon Euesque auoit peur que ceste maison tirast Iesus-Christ hors de son throsne, en la personne de son Lieutenant. C'estoit vne prophetie de l'aduenir. S'ils cõtinent en leur ambitieux dessein, ils contraindront sa Sainteté, ou de sortir d'Italie, pour n'estre pas assujettie à leurs brigues, pratiques & menées, qui pourroient diminuer sa liberté, & qui pourroient la rendre suspecte aux autres Princes de l'Europe, ou bien de

ſvnir avec tous ſes autres enfans , pour
 renger ce dernier venu , qui veut ſ'apro-
 prier le partage de ſes freres , & opprimer
 ſa mere.

7. *Ils ont les meſmes maux en
 leur gouvernement, & beau-
 coup plus grands que les au-
 tres Eſtats.*

Leurs Gouvernemens ſont triennaux,
 à la foule des ſujets , qui de trois en trois
 ans ſont deuorez par ceux qui viennent
 de nouveau, comme des mouſches mai-
 gres. Les charges ſont venales entr'eux,
 ou on les acquiert par des preſens, qui cou-
 ſtent bien plus cher que la taxe & l'annuel.
 Ils ont toute ſorte d'impoſitions , daces,
 ſubſides , iuſques à en auoir pour manger
 de la chair aux iours defendus. Ils font
 payer la centieſme, la vingtieſme du fonds
 en quelques Prouinces. Sicile , Naples &
 Milan crient pour cela iuſques au Ciel.
 Leurs ſoldats logent à diſcretion , & en
 uſent pour les femmes & les filles, comme
 l'hiſtoire le teſmoigne , & la verité le pu-
 blie dans les plaintes des Italiens. Ceux

qui traitent le plus mal les peuples, sont les mieux recompensez entr'eux. Ils doivent plus qu'ils ne payeront de vingt années. Leurs soldats font les mesmes maux que ceux des autres nations, & si ne sont pas mieux payez. Les jalousies entr'eux sont prodigieuses contre les estrangers qui les seruent, tesmoin le Prince de Parme, Doria, & autres qui sont encores en vie. Leurs Algazils ne sont pas plus courtois que nos Sergens.

8. *Quand ils font du bien à quelques uns dans les Estats, ce n'est pas par amour qu'ils leur portent : mais pour se servir d'eux, comme des traistres à perdre l'Estat.*

Les preuues de cela sont indubitables, & le sens commun en est vn perpetuel commentaire.

9. *L'humeur des Espagnols est insupportable à toutes les nations*

tions de l'Europe.

L'auteur de la Remonstrance dit luy-mesme, qu'il les hait à cause *de leur orgueil*. Ils mesprisent tous les autres peuples, comme si ce n'estoient que des Mores de Guinée, ou des Esclaues d'Angola. Le Connestable de Castille demandoit en la Franche Comté si le Connestable de France estoit galant homme. Leur port, leur discours, & leur visage, sont des preuves viuantes de la These; sur tout dans Naples, Milan & Messine. Ils n'ont iamais voulu souffrir que leurs sujets fussent sous nos Euesques & Primats François au Pais-bas, & a fallu que le Pape ait fléchy sous leur orgueil, pour faire de nouveaux Eueschez à leur fantaisie. il seroit à desirer, pour l'instruction de ceux qui en doutent, qu'ils fissent durant quelques années leur apprentissage de subjection sous vn Viceroy, pour voir ce qu'ils nous diroiēt à leur retour de nos Gouverneurs de Prouince. I'en appelle à tesmoins encor les bons Religieux des ordres nouveaux, qui ont esprouué des Superieurs Espagnols, qui sçauent bien ce que ie veux dire.

10. *Quand ils donnent du secours à quelques peuples en leurs necessitez, c'est à dessein de les opprimer.*

Par ce moyen les Romains se rendirent maistres de tout le monde. Du temps de la Ligue, les Espagnols aidoyent vne partie de l'Estat, pour le pouuoit opprimer tout, & l'assubjettir entierement. En Italie ils font du bien en détail, pour l'acquiesrir toute en gros. Ils ont aidé les rebelles Valtelins, pour auoir l'Estat des Grisons. Ils sont après à faire le mesme en Allemagne.

11. *Quand ils ont paix & alliance avec quelques vns, c'est pour pouuoir mieux dresser des intelligences dans leurs Estats.*

Philippes II. beau-frere de Henry III. esmeut & forma la Ligue en France, & y employa beaucoup de temps: car leur

besongne va lentemēt, mais elle chemine
 tousiours. La plainte des Venitiens est pu-
 blique, des entreprises faites sur leur ville
 en plaine paix. La cōqueste du Portugal se
 bastist de mesmes. Ferdinand nous pro-
 mit de nous laisser prendre Naples, pour
 auoir le Comté de Roussillon : il voulut
 puis après partager Naples avec nous, à la
 charge de nous oster le tout, comme il fit.
 Et si estoit-il nepueu de Louis XII. & si
 mettoit-il vn genouil à terre deuant luy à
 Sauonne. Il osta la Nauarre à sa propre
 niepce. S'ils ne se fussent pas seruis du pre-
 texte de l'alliance & du mariage d'Angle-
 terre, ils n'eussent pas pris si facilement le
 Palatinat.

12. *Ils ont le dessein de deuenir
 Monarques de tout le monde.*

Ils le disent eux-mesmes, & ne s'y fei-
 gnent pas. Ceux qui les flattent, parlent
 d'eux comme d'une *Monarchie naissante*.
 Aux Indes, ils disoient, *Le Roy d'Espagne est
 Empereur de tout le monde*. Et comme ils le
 disent, chacun les en croit. Les Italiens,
 les Allemans, les Anglois, & les François
 s'en sont plaints depuis Charles le quint.

Ce n'est pas vne plainte legere , ains vne publique professiō que les Espagnols font aux yeux mesmes de sa Saincteté, & de toutes les nations de la terre. C'est vne croyance qu'ont tous les peuples de l'Europe , qui ne peut estre mal fondée , puis que les Espagnols font tous les iours tout ce qu'ils peuuent pour y paruenir.

13. *Chaque Prince Chrestien est obligé en Dieu & conscience, sur peine de peché mortel, de s'opposer à tous ceux qui veulent détruire son Estat, de la conseruation duquel il est responsable à Dieu, par le iuremēt qu'il en a fait es mains de l'Eglise en son Sacre.*

Si quelqu'un en doute, il doit estre tenu pour traistre à sa patrie.

14. *Celuy qui veut estre Monarque uniuersel, & auoir la*

Seigneurie de l'Europe, proteste par ce dessein-là, publiquement, & veut que tout le monde le croye, qu'il procure & recherche par toutes voyes possibles, que tous les Rois, tous les Princes, toutes les Republiques deuiennent ses sujets: & par consequent que tous les Royaumes, tant par succession comme eslectifs; que tous les Potentats, vassaux ou souverains; que toutes les Republiques; que toutes les villes & peuples libres de l'Europe, & uniuersellement que toutes les dominations, autres que la sienne, soient détruites.

Quand les Romains ont assubjetty

l'univers, ils en'ont ainsi usé : & les Rois auxquels ils ont laissé le nom, n'ont esté que des petits estafiers des Proconsuls, iusques à ce qu'en fin le nom de Roy, & la dignité se soient tout à fait perdus. C'est la pratique de tous les Monarques vniuersels. Les Espagnols voulans la Monarchie de l'Europe, proposent de faire des Rois & Princes souuerains, comme ils ont fait de ceux des Indes, des Rois de Naples, Sicile, Portugal. Ils s'imaginent d'enuoyer aux plus florissantes Prouinces des Vicerois, qui de trois en trois ans emportent en Espagne les dépouilles des nations, avec des Eloges, comme celuy du Duc d'Osborne, qui erigent és villes plus florissantes des trophées, comme ceux du Duc d'Albe en Anuers, avec des inscriptions du Comte de Fuentes au Milanois, & autres semblables. Qui doute de cette verité, n'a point de sentimēt, & renonce au sens commun.

15. *Tous les sujets de quelques Princes, en quelque Estat qu'ils soient, soit Monarchie, soit Republique doiuent, sur peine de*

peché mortel, desirer la cōserua-
 tion des Estats, & des Princes
 sous lesquels Dieu les a fait nai-
 stre. Ils les doivent servir abso-
 lument, contre tous ceux qui les
 veulent détruire : Et sont tenus
 en cōscience, de desirer que celuy
 qui veut détruire leur Prince et
 son Estat, et s'acquérir sa domi-
 natiō, ne prospere point, ainçois
 que Dieu confonde la vanité de
 ses desseins injustes & Tyrāni-
 ques : Et par consequēt doivent
 tenir l'œil ouuert sur tous ceux
 qui traueillēt dās les Estats, par
 quelque pretexte que ce soit, à
 porter les cœurs, & les affectiōs
 des peuples, à favoriser en quel-
 que maniere que ce puisse estre,

les desseins de celuy qui veut
 renger sous son Estat tous les
 autres. Et de plus, doivent estre
 pleinement persuadez, que de
 faire autrement, c'est trahir son
 pais, & cōmettre un grand cri-
 me devant Dieu, qui veut que
 nous Aimions le Roy : &
 partant, que nous haïssions, &
 ayons en horreur, tous ceux qui
 le veulent ruiner, ou qui veulent
 détruire son Estat.

Toutes ces Propositions ont vne ne-
 cessité infaillible. 1. En la verité de l'histoi-
 re. 2. En la Politique. 3. Et en la Theolo-
 gie; chacune en son endroit.

F I N.

